

Un festival di boeki pa mucha yen di sorpresa

STA. CRUZ -- Olga Buckley ta un di e autornan cu ta participa na e festival di boeki pa mucha di biblioteca. Apertura di e Festival ta dia 2 di November y e bishita na schoolnan ta tuma lugar den e siman di 5 pa 9 di November 2012. Cada aña e festival tin otro tema y un grupo di autor, ilustrador y contador di cuenta di boeki pa mucha for di Aruba Antiyas y Hulanda y otro pais ta bishita mas o menos 65 di e 68 schoolnan riba nos isla. E tema di aña 2012 ta "Multiculturalidad" y e lema ta: 'Nos mundo ta draai y ami ta sigui lesa bay'. Esaki ta e di 20 festival cu biblioteca ta organiza pa stimula mucha pa lesa y pa stimula combersacion y interes pa autor di boeki pa mucha como tambe ilustrador y artista.

Olga Buckley ta maestro di school di alma y curazon. Casi henter su carera el'a traha den enseñansa special. Aki el'a mira e bentaha grandi di siña e mucha algo den su idioma materno. For di tempo cu ainda Hulandes tabata idioma di instruccion den enseñansa special, el'a cuminsa duna les scondi na Papiamentu na School Kibrahacha. El'a sigui mayoria di curso



y tayer riba tereno di Papiamentu y a termina e studio di Papiamentu di Tres Grado cu exito.

Actualmente Olga ta pensiona. E ta traha 3 dia pa siman, naturalmente den enseñansa special. E dos otro dianan e ta dedica completamente na promocion di lesamento. Lesamento y literatura ta Olga su pasionnan di mas grandi. E pasionnan aki a motiv'e pa lanza na 2007 e proyecto di promocion di lesamento, Bon Nochi, Drumi Dushi. Awendia BNDD ta bon conoci den nos comunidad, danki na e entusiasmo y motivacion di e lesadornan cu ta bishita nos muchanan pa conta storia. Olga ta convenci cu pa crea un clima di lesamento riba nos isla nos mester hiba e placer di lesamento cerca e mucha den su

ambiente di cas. Olga ta haya cu boeki ta un herment placentero pa explora mundo y siña conoce bo mes. Olga a presenta e proyecto na Corsou, Surinam, St. Maarten y St. Eustatius.

Na 2011 Olga a ricibi e Prins Bernhard Cultuurfonds Prijs pa promocion di lesamento pa e proyecto. Na momento di ricibi e premio Olga a enfatiza cu e ta tuma e premio na nomber di directiva di Fundacion Bon Nochi Drumi Dushi, pasobra sin nan sosten e proyecto no ta posibel. E aña aki Fundacion Lanta Papiamentu a otorga Fundacion Bon Nochi Drumi Dushi e premio Chuchubi pa su esfuerzonan incansabel pa promove Papiamentu. Olga ta skirbi poesia y boeki pa mucha. Na 2002 el a publica su prome tomo di poesia pa adulto 'Curashi'. Su di dos tomo 'Sin waak patras' a keda publica na 2008. E tomo ta contene 35 poema y varios pensamiento. Na 2006 el'a publica su prome boeki di mucha 'Bencho ta dual', e prome boeki di e serie di Bencho. E di dos boeki di e serie aki, 'Bencho ta gana un bais' a keda publica na 2008. Den e serie di Bencho e personahe principal ta crece den transcurso di tempo. Olga ta trahando duro pa publica e di 3

boeki di e serie na 2013, hunto cu su di 3 boeki di poesia. E personahe di Bencho a nace hopi aña pasa, for di un custumber cu Olga tabata tin di para les, cana bay den hoeki di lesa y cuminsa inventa un storia, pa gana e atencion bek di e muchanan.

Olga ta co-autor di: Antillenboek; Bronnenboek. Un boeki cu serie di les cu Antiya como tema, publica na 1983 pa IVIO Leystad Hulanda. Na 1996 Olga a forma parti di e grupo di traductor cu tabata tin e traduccion di e diario di Anna Frank na Papiamentu na su encargo. El a participa na diferente tayer di skirbi y conta storia y a duna tayer di poesia y di skirbi. E aña aki el a traduci hunto cu Desiree Correa e boeki "Prinses Ivana" di

Hilli Arduin.

Festival di boeki pa mucha

Diferente autor, ilustrador y contador di cuenta di Aruba, Corsou, Bonaire, Sint Maarten, Hulanda, Jamaica y Surinam ta participa na e festival anual. Muchanan por spera presentacion di: Hulanda: Mylo Freeman, Tjibbe Veldkamp, Evelien van Dort y Sjoerd Kuyper. Corsou: Tio Ali (Alvin Inecia), Roland Colastica. Bonaire: Tio Gabi (Gabriel Mercera), Kathleen Thielman. St. Maarten : Loeki Morales, Surinam : Hilli Arduin, Jamaica : Amina Blackwood Meeks, Aruba: Robert Reeberg, Olga Buckley, Desiree Correa, Mariebelle Arends, Dolfi Kock, Dora Lauffer-Mathilda, Noris van Lis-Donata, Olga Orman. Pa un siman largo biblioteca ta presenta un festival di boeki atractivo y diverso. Autornan ta bishita schoolnan pa presenta nan mes y conta algo di nan boeki, tambe pa lesa fragmento for di nan boeki of di e trabao di skirbi boeki. Ta e intencion pa stimula un interaccion entre mucha y autor. Despues di merdia tin diferente presentacion tambe na biblioteca Playa y San Nicolas.

